



## 天時變化

今年个天時變化盡大，新曆過年个時節大家還無試著有幾寒，話著今年个寒天又會盡燒暖，毋多使背大襖了。官知到月尾轉大寒，臺灣北部盡多毋識落雪个淺山通盤變到白雪雪仔，連平洋就差點仔落雪，大家手寒腳痺，見面就問：「仰會恁寒？」、「有去睭雪無？」、「愛去哪位睭雪較好？」盡多七、八十歲个老人家堵著這種天時，乜著下驚，想自家食到恁多歲還毋識堵過落雪。因為，臺灣係在熱帶地，想睭雪，毋係愛去寒帶國，就係愛等到寒天時，跔跔去大山頂正有好睭。毋過，今年無共樣，北部淺山也有落雪，毋使再過入到深山肚就有雪好睭。該日，又堵堵好係禮拜天，盡多人把握這難得个機會全家同下駛車出門，從早到夜就有人上山睭雪。長長个車陣膠山路塞到停動毋得，有兜人睭煞，還在車輛面頂作(zog)个雪人，載轉屋下做紀念。這種光景對臺灣人來講十分難得，連外國个電視臺乜有做特別報導。

毋過，耕種人堵著落雪就盡艱苦了！無胚著天時仰會忽然間變恁寒，還來毋掣搶收、做防備，就目金金睭等自家辛苦種个菜、柑仔通盤分雪打熟忒、綿淨淨，毋單淨賺無半點錢，連工錢膠本錢就提毋轉來，想起來心肝就疾，耕種人真經係睭天食飯啊！

盡多年以前，科學家就警告地球个過度開發，會造成天時个變化緊來緊大。臺灣恁多年來就受到天時變化盡大个影響——大寒、又大熱，病疾就增加；雨落到少就做旱，無水好耕種；風搓來到就發大風、落大雨，變成大損害。係人類再過無改變現下个生活方式，天時變化造成个損害絕對會變大。為著自家，也為著所有个人，大家定著愛學習過省儉个生活，做得隨手來關電火膠電器、少吹兜冷氣、多行路少坐車、衫褲著較久兜、資源回收再利用、食在地生產个菜、多食青菜少食肉氣……等等。係大家同心來做到以上个內容，相信天時會慢慢恢復正常，大家也較做得安居樂業。

作者：林伯殷

### ☆詞彙學習☆

【天時】tien<sup>ˊ</sup> shi：天氣。

【無胚著】mo poi<sup>ˊ</sup> do<sup>ˋ</sup>：沒料到。

【話著】va<sup>ˊ</sup> do<sup>ˋ</sup>：以為。

【來毋掣】loi m chad<sup>ˋ</sup>：來不及。

【背大襖】ba tai<sup>ˊ</sup> o<sup>ˋ</sup>：穿大衣。

【目金金】mug gim<sup>ˊ</sup> gim<sup>ˊ</sup>：眼睜睜。

【停動毋得】tin<sup>ˊ</sup> tung<sup>ˊ</sup> m ded<sup>ˋ</sup>：動彈不得。

【疾】cid：痛。

### ☆文法學習☆

【毋單淨……，連……】：m<sup>ˊ</sup> dan<sup>ˊ</sup> ciang<sup>ˊ</sup>……，lien……：不只是……，連……。「毋單淨」後接事件，「連」後接其他連帶之事。

例1：毋單淨賺無半點錢，連工錢膠本錢就提毋轉來。（不只是賺沒半點錢，連工錢和本錢都拿不回來！）

例2：毋單淨人傷著，連車仔也壞忒了。（不只是人受傷，連車子也壞掉了。）

例3：毋單淨有晝好食，連點心就準備好了。（不只有午餐可吃，連點心都準備好了。）